



RSF-i Zamzam refugee camp maneni makdar

Kiplimo-i otsü tasen ka yangluogo



VOL. XXII ISSUE NO. 124 (ADOK 124)

DIMAPUR

TENTONÜ (MONDAY)

TSÜKLAI (FEBRUARY) 17, 2025

₹ 5.00

JEE Main 2025 atema NE kaketshirtem nem 'special quotas' agütsür

Aizawl, February 15, 2025 (Agencies): Central Seat Allocation Board (CSAB)-i Northeastern state tem nungi kaketshirtem dang Joint Entrance Examination (JEE) Main 2025 agütsütsü ayongzüikogo.

"Tesüiba kümtem meyipa reprangdangra JEE Main exam nung Northeast nungi kaketshirtem kanga ajema liasü" ta NIT Rourkela nungi CSAB Local Organising Committee Chairman, Prof. Anindya Basu-i Aizawl nung osangbener senden ka nung ashi.

Northeast nungi kaketshirtemi iba national entrance exam nung shilem agütsüla aser India nung technical institutions tematiba nung azüngtsüla, ta pai ashi.

"CSAB-i Northeast kaketshirtem asoshi reserved seats yuja lir, counselling rounds aser multilingual support agütsür" ta Basu-i ashi.

JEE Main nung Northeast nungi kaketshir aika adentsü atema CSAB-i meranger. Onoki awareness campaigns agir, kaketshirtem dang reservation policies indang metetdaksür aser home state quota tajangzüiktem ashir ta paisa metetdaksü.

Taküm NITs balala nung menden 24,000 shi lir aser iba nungi Northeast State Quota kübok menden 2,000 lemezükja lir. Maneni CSAB-NEUT category kübok menden 740 lir ta Basu-isa ashi.

JEE Main 2025 atema register asütsüba tatembang anogoji February 24, 2025 lir. Class XII mesüra equivalent class nung nüngdakba marks nguteta takok angurtemi JEE Main 2025 agütsütsü akok.

Northeast kaketshirtem yarütsü atema CSAB-i dedicated counselling rounds agir.

US nungi India nunger 112 meyipa yok

New Delhi, February 16, 2025 (Agencies): United States nung ozüng alema alir India nunger 112 mener aruba tayimtsü ka Deobhar aonung Amritsar tonga aruogo.

Donald Trump'er sorkari ozüng alema arurtem anema inyaka arudang tesüiba anogo 10 tsüngda tayimtsü asem ajanga India nunger meyipa yokogo.

US Air Force indang C-17 Globemaster tayimtsü taonung 10.03 ako meta Amritsar

International Airport nung arua anenzüka liasü.

Iba tayimtsü nung arur nisung 112 rongnung Punjab nungi parnok 31, Haryana nungi 44, Gujarat nungi 33, Uttar Pradesh nungi 2 aser Himachal Pradesh o Uttarakhand nungi kaka dena lir.

Ketdangsürtemi parnok ajak indang immigration, verification aser background checks asüba sülen pei pei kidangi yoktsü.

Kuki-Zo MLA temi President's rule pelaa agizüker

Imphal, February 16, 2025 (Agencies): Centre-i Manipur nung President's Rule benokba pelashishia agizüker aser India sorkari yimjung aser temeten atema yimtenren inyakyim tajung ka latettsü ayongzüker ta Manipur nung Kuki-Zo nunger MLA temi metetdaksüogo.

Manipur nung tebilemstü ya koktettsü atema olemteptsü ka nüngdaker. Rara agi kongshia alirtem aser pei talidak toktsür aoertem khuret ajema kümdaktsütsü atema mapang lemsar maparen kar inyaktsüla ta MLA 10-i ashi.

Centre sorkari Manipur tensa süngjemdaksütsüla aser Kuki-Zo nunger temetentem kümzüka ayutsüla ta MLA temisa ashi.

"Centre-i Suspended Animation kübok Assembly ayutsü lemtetba atema pelar. India sorkari political roadmap ka renemtsü imlar" ta Kuki-Zo MLA temi sangdong ka nung ashi.

Kuki-Zo Council-i rally ayonger:

Külen, Manipur nung Kuki-Zo Council (KZC)-i February 18, 2025 nü 'Peaceful Rally for Immediate Political Solution'

agütsü ayongzüikogo.

Kuki-Zo nunger aliba district ajak nung iba rally agütsü aser parnoki mapang talangka meshia aruba ketdangsübaren balaka- Union Territory with Legislature nenshütsü.

Churachandpur nung Kuki-Zo Council senden ka amendang iba rally agütsü lemteta liasü. Parnoki telok balala dang pei pei tesem nung iba sentong agütsü mapa lemezüktsüogo.

Kuki-Zo Council (KZC)-i, Indigenous Tribal Leaders Forum (ITLF), Committee on Tribal Unity (CoTU) & Kuki Inpi Sadar Hills, Indigenous Tribes Advocacy Committee (ITAC), Kuki Inpi Jiribam, Hill Tribal Council (HTC), Kuki Inpi Chandel, Kuki Chief Association aser KSO Delhi & NCR o Kuki-Zo Women's Forum Delhi teloktem nem mapa lemezüktsü.

Parnoki Parliament nung Kuki-Zo tebilemstü benoka jembütsü, Separate Administration (Union Territory with Legislature) agütsütsü, political solution medeni arrtsü matsüdagtsü aser 'Biren Audio Tapes' atema temeten meshia takhangbatem agütsütsü.

Nagaland Forest Management Project (NFMP)-i SKOCH Award angu



February 15, 2025 nü India Habitat Centre, New Delhi nung DCF (HQ) & Deputy Project Director, NFMP Ango Konyak den Resident Commissioner Nagaland House, New Delhi Wennyei Konyak nati SKOCH Award agizükba angur.

Dimapur, February 16, 2025 (TYO): Nagaland Forest Management Project (NFMP) nem SKOCH Award 2024 agütsüogo.

February 15, 2025 nü India Habitat Centre, New Delhi nung 100th SKOCH Summit alidang national award winners nem sempet lema agüja liasü.

Iba sentong nung Department of Environment, Forests & Climate Change (DEFCC), Government of Nagaland (GoN) tenüng nung DCF (HQ) aser Deputy Project Director, NFMP Ango Konyak den Resident Commissioner Nagaland House, New Delhi Wennyei Konyak nati iba sempet agizüka liasü.

BJP tasa ajanga Manipur sorkar loksatsü: DMCC

Imphal, February 16, 2025 (Agencies): Bharatiya Janata Party (BJP)-i Manipur raksatsütsü meranger ta Delhi Meetei Co-ordinating Committee (DMCC)-i tai tongoktsüogo.

President's Rule benokba aser tesem kar shimteta Armed Forces (Special Powers) Act (AFSPA) benokba ya Manipur sorkar ketdangsübaren tashimait kümdaktsütsü aser Meetei nunger amokbangtsü nükjidong nung inyakba lir ta DMCC-i ashi.

Manipur nung President's Rule mebenokdang February 12, 2025 nü DMCC-i emergency online meeting ka ayonga amen.

BJP inyaksangshi tashi itta liaka Chief Minister N. Biren Singh mapa nungi anentsü akhangba sülen pa melener ka danga meshimtet. Iba inyakyim ajanga Manipur nung lenisüba mali kümdaktsü aser President's Rule benok ta DMCC-i ashi.

February 15, 2025 nunga senden amendang ozüng metetertem, shisashirtem, human rights activists aser taoba sorkar ketdangsürtem jaoka shisatsü lemsatet. Senden nung adenertemi BJP sasep nung jembiba aitsü aser iba ya public anisatsü atema "political drama" ka liasü, kechiyong Centre sorkari President's Rule benoktsüba ya jelia renemadoker liasü ta DMCC-isa metetdaksü.

Inyakyim shitak agi amenokba

sorkar ka BJP-i atsüngdok aser iba ya democracy anema inyakba mapa ka lir. Manipur Legislative Assembly nung BJP-i aniba sorkar pusemba MLA 60 nungi 54 liaka sorkar atsüngdok. Anungji iba ama tensa ka nung President's Rule benokba ya Centre-i miimba tasa atonga inyakba lir ta parnokisa tai tonglokttsüogo.

DMCC-isa December 2024 nung taoba Home Secretary Ajay Kumar Bhalla Manipur Governor inyaktsü shimba asoshi tebilemstü abenba metetdaksüogo.

CM Biren Singh agienba aser President's Rule benokba ya Chin-Kuki teloktemi mapang talangka nungi takhangba agüja aruba onük ka lir. India sorkar aser security forces-i Chin-Kuki teloktem Suspension of Operations (SoO) agreement kübok kümzüka ayur ta DMCC-isa ashi.

Indian security forces-i Kuki telungpurtem SoO agreement kübok kümzüka ayur. Kuki telungpurtem nem police station, sorkar office tem aser sepaitem makdaksür aser tatalokba balala nung Indian security forces 12 taküm samaogo saka Kuki nunger dang kecha mashir ta DMCC-isa ashi.

Chin-Kuki teloktemi akhangba ama November 2024 nung AFSPA tanaben benok. Centre-i

NFMP ya DEFCC, GoN ajanga inyakba mapatong ka lir aser Japan International Cooperation Agency (JICA)-i teyari agütsür.

Iba mapatong ya forest ecosystems tajungba akümtsü aser tekong lu ayimertem yarütsü atema lir. Iba mapatong ya Joint Forest Management Committees-i anir inyaker.

NFMP ya 2017 nungi 2027 tashi lir aser district 11 nung yimtsüng 185 nung mapa inyaktsü. Iba mapatong ya Forest Ranges 22 nung inyaktsü aser Forest Intervention kübok 79,096 hectare ayimjemtsü aser livelihood component kübok Self Help Groups 555 tentettsü.

SKOCH Award ya state tem aser teloktem nem agütsüba sempet tulu ka lir. Iba sempet ya SKOCH Group ajanga agütsür aser parnok ya India nung 1997 nungi socio-economic issues atema tongtipangtiba telok lir.

Iba sempet ya CEO's Association for Inclusive India (CAII)-ia pusema nungiter.

Kuki telungpurtem anema inyaktsü melena Meetei yimtsüngtem nung AFSPA benok. AFSPA aser President's Rule ajanga Meetei nunger asoshi tetsüba tia ka bentsür aruogo ta parnokisa metetdaksü.

BJP-i aniba Centre sorkari Manipur sorkar loksatsüba ya tesüiba nunga inyakogo. 2001 nung President's Rule kübok lungkak aitba mapang Manipur State Assembly aser MLA quarters 16 rongdoktsü. Iba mapang sepaitemi Meetei civilians 18 tashi khaset ta DMCC-isa ashi.

February 15, 2025 nü DMCC senden amendang Manipur nung President's Rule agentsü aser sorkar ketdangsüdaktsütsü takhangba agütsüogo.

SoO kübok Kuki telungpur teloktem ozüngi noktanga telok ka züngoktsü aser parnok anema mapa inyaktsü. India-i metokmeperi aliba Burma policy anentsü kechiyong iba ajanga Kuki telungpurtem yarir ta DMCC-isa takhangba agütsü.

Parnokisa Prime Minister-i indangindanga yimjung bener arutsü mapa inyaktsü aser Meetei o Kuki nunger tsüngda olemtep tenzüksü takhangba agütsüogo. Manipur nung tensa mazüoktetba atema Home Minister Amit Shah mapa nungi agentsüla ta DMCC-isa takhangba agütsü.

PCC nung 1st Creative Arts Fest 2025 temogo



1st Creative Arts Fest 2025 sentong nung TAFMA chairman, Theja Meru-i jembiba noksa nung angur.

Dimapur, Tsüklai/February 16 (TYO): Patkai Christian College (PCC) nung Task Force for Music and Arts (TAFMA) den lungjemer ayongzükba 1st Creative Arts Fest 2025 sentong February 15, 2025 nü Bundrock Auditorium nung tembangogo.

Sentong akhumtong ka ama TAFMA chairman, Theja Meru-i kaketshir dang mangdang tulu yur inyaksü aser nükjiding ayutsü ayongzük aser

asenoki takum nung kanga kera tezü atanger, ta ashi.

"Tang agüjang aser khen lir asayang, mesüra tang asayang aser khen lir agüjang," ta pai pa takum melenshidaksüba shin o ka ashi aser tang mapang junga amshiba ajanga tarutsü nung junga alitsü lenmang lapoktsü ta ashi.

"Tang agütsütsü tamadok. Nü dak amangang aser alimai nü dak amangtsü. Patkai nung mangdang 1300 lir, teimlar 1300

lir aser item yagi mapa inyak tenzükra Nagaland melenshitsü," ta Meru-i ashi.

Iba sentong nung PCC indang Founder aser Principal, Tuisem A. Shikshak dena liasü.

Sentong nung Slytherin, Gryffindor, aser Targaryen house temi telok ken aten aser kaketshir temi fashion design sayua liasü.

Kaketshir temi 'The One Who Was Dead' indang saya ka agi shilem agia liasü.

ASU-i tatidang mapang ola tesashi azüoktsü ayongzük

Kohima, Tsüklai/February 16 (TYO): Angami Students' Union (ASU) ajanga ano maneni tang HSLC, HSSLC aser CBSE tatidang agiba mapang kaketshir meinprongtsüsa ola tesashi aser tulu azüoktsü nenshia metetdaksü.

Iba dak sendakba nung tayongzükba ka February 8, 2025 nunga agütsüogo, ta Union

ajanga ashi.

Ajisüaka Kohima jila nung cafes, restaurants aser tesem kar nung tim masüba mapang ola tulu adoka ken atemba angashir, ta sangdong ajanga ashi.

Kiyong-kidanger temi ashishiba nung ajemdaker ASU ajanga Deputy Commissioner, Kohima nem osang agütsüogo, ta sangdong ajangasa ashi.

Hindi oshi agi linük lungjemdaksür: Ganesan

Kohima, Tsüklai/February 16 (TYO): Nisung aikati kanga yongya aliba kenten sentong Fusion of the Bands tanabuba Rangapahar Military Station nung Honibar nikongdang agia liasü.

Iba sentong nung tongti tesemdanger ka ama jembidang Nagaland Angh La Ganesan-i India nung kin telemsa balala aliba aser ken ajanga lungjemdaksüba

tashi indang jembia liasü.

Naga nungeri ken meimba den Hindi ken atenba ya India indang unity in diversity kuli ka lir, ta ashi.

Hindi ya nüburtem tsüngta jembiba oshi ka kisung masü saka temulung aser tekolok sendakteptsür, linük lungjemdaksüba nung tongti shilem agir, ta Angh La Ganesan-i ashi.



Assam Rifles ajanga tanen makai National Integration Tour ayongzükba nung shilem ka ama Nagaland nungi tebur ti aser tetsür ti Goa nung oa tesem balala sema anir raja liasü. February 13, 2025 nü parnok Goa tonga ao aser yangji otsü aliba tongtipang tesemtem repranga anir jajatar.

Department of School Education ajanga metetdaksür

Dimapur, Tsüklai/February 16 (TYO): Department of School Education ajanga sangdong ka nung, temelaba agüja aliba Private Schools (Primary aser Upper Primary) recognition, renewal of recognition aser up-gradation

indang application format aser permitted Pre-Schools atema recognition format tem Department indang website h t t p s : / / education.nagaland.gov.in nung upload süja lir, ta ashi.

Iba formats ya iba sangdong

agütsüba anogo nungi tenzük March 15, 2025 tashi angutsü. Anungji apply sünüba school temi nüngdakba format download süa kasaji Department nem latetja aliba mapang agütsütsü metetdaksür, ta sangdong ajanga ashi.

Dimapur nung Eagle Crest Training Academy & Consultancy brand semzükogo



Deputy Commissioner, Dimapur, Dr. Tinojongshi Chang den Eagle Crest indang CEO aser züngsemtem tangokba noksa ka yangi angur.

Dimapur, Tsüklai/February 16 (TYO): Eagle Crest Training Academy & Consultancy (ECTAC) indang brand February 15, 2025 nü "Soar, Lead, Empower" nung ajemdaker Dimapur nung semzükogo, kong tongti tesemdanger Deputy Commissione, Dimapur, Dr. Tinojongshi Chang, NCS aser sentong akumdong District Employment Officer, Gideon Sumi liasü.

Deputy Commissioner, Dr. Tinojongshi Chang-i iba sentong nung jembidang 'skill-based employment' nüngdaker ta ashi.

Training aser placement sentongtem ajanga parnoki lanurtem nem mapa agütsüba asoshi pai Eagle Crest team

nem tenünsang agütsü.

Taoba mapang Emporium ta nüngja agütsür aliba mapang Nagaland nungi lanurtem international sector balala nung mapa agütsüba indang Chang-i bilemteta ashi.

Pai sorkar mapa makaba tebilemtsü benoka jembidang tawa Grade IV post 13 atema graduates aser engineer tem asoshi application 2,100 dak tema aruba athishia jembia liasü.

Employment tsütsü skill development ya kanga nüngdaka kumogo aser sorkaria vocational training sentongtem yarir, ta ashi.

Skill nung ajemdaker training agütsüba ajanga rongsenketzüng tsütsü maongka

tuluba akumtsü, pei sasa pei peria alitsü, sorkar mapa nung metaloka aliba ajema akumtsü, ta Dimapur DC ajanga ashi.

Skill Development Committee nung chairman ka ama pai maneni yarutsü aser employment asoshi business associations den lungjemer inyaksü ashi.

Chang-isa company indang official website semzüktsü aser alumni association tenzükja liasü aser sentong akumdong Gideon Sumi-i Tourism & Hospitality Training Manual sayaja liasü.

Sentong akumdong Sumi-i Eagle Crest den mapang talangka nungi sendaktepa aruba indang lemsatepa liasü.

Paia kija nem tashi agütsütsü

aser lokti tashi itshidaksüsü asoshi skill development ajanga tongti shilem agiba indang rasaa ashi aser sector balala nung skilled professionals nüngdaka kumogo, aser zünger mapa mangu aliba lanur aika maongka tasen asoshi renema mali, ta ashi.

Lanurtem takum nung takok angutsü asoshi nüngdakba skills agüja lenmang sayuba atema Eagle Crest nem tenünsang agütsü.

Ano iba reju ajanga IDAN Government of Nagaland den lungjemer Skill Loan Scheme tenzükba asoshia pelaba lemsatepa liasü.

Iba scheme ya "train, get a job, and pay later" yimya nung lir aser iba yagi zünger mapa mangu aliba lanurtem ajangzüktsü imlar.

Nagaland nung employment indang jembidang state nung employment exchanges nung register süa aliba züngser mapa mangur nisung 72,000 dak tema lir, ta pai ashi.

Item rongnung Dimapur, Chümoukedima aser Niuland district tem nung timtiba (27,000 jungnüa) par office kisung nung tenüng agüja lir, ta Sumi-i ashi.

Sorkar mapa tatakzük dang lir aser küm shia graduates meyirijang aika mapa bushi tenzük, anungji training institutes temi maneni skill development training tem

agütsütsüla, ta pai ayongzük.

Iba sentong tenzük Alemsunep Jamir, Pastor, World Impact Community Church ajanga sarasadem aser Temjenkala Aier, CEO, ECTAAC ajanga pela agizükba o jembia liasü.

Jettina Jamir aser Imliakum Aier nati ken yimya balaka agi shilem agia liasü.

CHSS indang Vice Principal Patricia Zhimomi-i educational sector tenüng nung jembidang, career development nung vocational training nüngdakba lemsatepa liasü.

Eagle Crest ajanga aviation, hospitality aser cruise line sector tem nung bendanga agütsür skill development agütsüba asoshi lai tenünsang agütsü.

Eagle Crest nung Christian Higher Secondary School nungi kaketshir shilem 20-30 tsüngta tenüng zülüoka lir, ta ashi.

Lai tsürabortem danga akhi yimya nung masü saka skill-based education ang bushidaksütsü ayongzükba liasü.

Sentong nung Eagle Crest nungi alumni aser guardians temi takum kuli agütsüba video sayua liasü.

Sentong tembanga Allin Awomi, Operations Manager & International Placement Head of ECTAAC ajanga melepzüng o jembi aser Aviation Trainer Asheli Yephthomi ajanga sarasadema liasü.

Delhi Railway station nung 18 ajemset



New Delhi, February 16 (Agencies): Honibar aonung New Delhi Railway Station nung lokti tulu nungtepdang tetsür 11 densema nisung 18 ajemset aser aika yiruogo.

Maha Kumbh nung shilem agitsü atema Uttar Pradesh kübok Prayagraj-i aotsü asoshi platform number 14 aser 15 nung lokti tulu train-i ayaketa atutsü nungtepba mapang nung iba lendong ya atalok.

Osangbener den jembidang Acting Chief Minister, Atishi-i, tasümgang 15 Lok Nayak Jai Prakash Hospital-i anir aru ta metetdaksü, ajisüaka iba sülenji ano nisung asem süogo.

Lokti tulu nungtepdang nisung aika ajemset aser nisung aika tangu mesashiteti timtema

liasü, ta tenük kuli alirtemi metetdaksü.

Deputy commissioner of police (railway)-i, Prayagraj Express train apusotsü lia platfrom number 14 nung lokti tulu liasü; iba dak alia platform numbers 12, 13 aser 14 nunga Swatantra Senani Express aser Bhubaneshwar Rajdhani Express train na atartem-a aika adenshia liasü, ta metetdaksü.

"Railways-i ghonda shia general ticket 1,500 shi ayok, ibayongji station nung lokti tulu liasü aser ibaji mazüokteti liasü. Platform no. 14 nung aser platform no. 16 anasa lokti tulu nungtepdang nisung aika ajemset," ta DCP-i metetdaksü.

Iba lendong ya Honibar

aonung 10:00 ako atongtsü anasa ataloka liasü.

Northern Railway Chief Public Relations Officer (CPRO), Himanshu Upadhyay-i, tamasa passenger tem rongnung kati ka dak nungoktsüba ajanga kar yirua hospital-i anir ao; iba sülen-a lokti tulu nungtepdang iba lendong ya atalok, ta metetdaksü.

Osangbener den jembidang passenger rongnung ka, Dharmendra Singh-i, "Ni-a Prayagraj-i aotsü atema train ata-a liasü, ajisüaka train aika menoa maru aser train kar thinen, ibayongji train station nung nisung aika aküm. Iba station nung ni lokti tulu yamai kodanga mengudang," ta metetdaksü.

Tanü Delhi Chief Minister shimtsü aser Feb 18 nü tenangzükba agitsü

New Delhi, February 16 (Agencies): Hombarnü BJP-bangdak lenirtemi Delhi Chief Minister shimtsü aser February 18 nü sorkar tasenba tenangzükba agitsü, ta osang ka ajanga metetdaksü.

Delhi nung Chief Minister menden atema tesüiba anogo ishika o lemtepa arudar, ajisüaka party lenirtemi tang taghi ola madoker.

CM menden atema Parvesh Verma, Ashish Sood aser Rekha Gupta nungertem rongnung ka shimtsüa akok, ta aikati bilemer.

Tawa BJP-i, Ato kilonser Narendra Modi US nungi meyipa aruba sülen Chief

Minister shimtsü aser sorkar akümtsü atema asüngdangtsü, ta metetdakja liasü.

Tawa Delhi assembly election nung Parvesh Verma-i AAP tongti Arvind Kejriwal madak takok ngua liasü, anungji pa nem CM menden agütsütsü, ta bilemer. Ano külen Ashish Sood ya Delhi BJP general secretary lir aser Rekha Gupta ya party nung tetsürtem rongnungi tongti lenir ka. Iba dak alia CM menden atema Delhi assembly nung taoba mapang opposition lenir aser BJP lenir tain, Vijender Gupta shimtsüa akok.

Osang angazükba agi, minister menden atema MLA 15 bo shima lir aser Delhi nung Deputy Chief Minister mendenbo malitsüa akok.

CM shimtsü atema Ato kilonser Narendra Modi, Home Minister Amit Shah, BJP Tir JP Nadda aser party nung tongti lenirtem senden amentsü.

Tawa assembly election nung BJP-i menden 48 nung takok ngua liasü aser tanünga menden 22 ji AAP-i angu.

AAP-i tesüiba küm 10 tashi Delhi yimsüsüa aruogo. BJP-i küm 27 sülen Delhi nung takok ngua sorkar akümtsü.

US nungi maneni India nunger 116 meindok

Amritsar, Tsüklai/February 16 (Agencies): Honibar aonung US sepaitem indang tayimtsü ka ajanga US nung ozümg alema oa alir India nunger 116 anir aruja Amritsar airport tongogo.

US nungi meindokba India nungertemji Punjab nungi parnok 65 liasü, Haryana nungi 33, Gujarat nungi 8, Uttar Pradesh, Goa, Maharashtra aser Rajasthan nungi anana aser Himachal Pradesh aser Jammu & Kashmir nungi kaka liasü.

Amongnü Punjab kübok Chandiwala yimtsümg tonga arusang arrshi küm 20, Sourav-i, January 27 nü pai arrtsü adena US telungi aitsü merangba mapang nung US ketdangsertemi apu, ta metetdaksü. Yaküm December 17 nü pa kidang nungi apusoa liasü.

Sourav-i, "Onok anogo 18 tashi camp (detention centre) ka nung pua ayu aser onok ket nungi phone meshizüka ayu. Yakünü onok dang, 'nenok tanga camp kati anir aotsü' ta metetdakja liasü. Onok tayimtsüi tudaktsüba mapang nungang onok India-i anir aoer ta onok nem metetdakja liasü," ta ashi.

Pai ashiba agi, pa US-i yoktsü atema par kibongi sen lakh 45-46 shi indoka liasü.

Sourav-i, "Ozü kibongi alu li acre 2 ayok aser commission agent ka dang sen apua liasü. Ni Amsterdam, Panama aser Mexico ajanga US arrtsüleni anir ao," ta metetdaksü.

Osangbenertemi ano nisung ka tenümg agi Harjit Singh dang, tayimtsü ajanga Amritsar-i anir

arudang nenok tetsümg-teben alen asü?, ta asümgdangba langzüdang pai, "Onok teka 'handcuff' asü aser tetsümg chain lisü agi alen. Tanep 6:00 ako nung onok ki atong," ta ashi.

Singh ya Gurdaspur district küok Khanowal Ghuman yim nungi lir.

"January 27 nü onok US arrtsü adena aoba mapang nung apu aser anogo 18 tashi detention centre ka nung ayu. Onok February 13 nü tetsümg teben ajak alener anir ao," ta paisha ashi.

Singh-i, pa den par kinünger ka na US-i aotsü atema par kinüngertermi sen lakh 90 shi indoka liasü, ta metetdaksü.

Mantaj Singh-i, "Onok tim lenmgang ajanga America-i anir aotsü ta nangzüka liasü, ajisüaka tim masüba lenmgang ajanga anir ao. Ni US arrtsü adena aiba mapang nung US Border Patrol-i apu," ta metetdaksü.

Ano Kapurthala district kübok Behbal Bahadur yimdak Sahil Preet Singh'er tsüraburtemi, parnok par jabaso US-i yoktsü atema sen lakh 40-45 shi indoka liasü, ajisüaka travel agent kati parnok ashioktsü, ta metetdaksü.

Sahil tetsü, Harvinder Kaur-i, "Ozü jabaso America-i yoktsü atema ozüi alu aser hon agi yangluba senti osettem ayok. Iba dak alia kinüngerterm dang nungia sen apu," ta metetdaksü.

Laisa Punjab sorkar dang par jabaso nem sorkar mapa agüjang aser parnok ashioktsüsang travel agent anema ken o benokang, ta takhangba agütsü.

Delhi nung BJP-i takok anguba sülen Yamuna ayong merük tenzükogo

New Delhi, February 16 (Agencies): Tawa Delhi assembly election nung BJP-i takok anguba sülen anogo ishika tsümgda Delhi Lieutenant Governor, VK Saxena lenisüba kübok Yamuna ayong merüktetsü atema maparen tenzükogo.

Election nüboyimba mapang nung Ato kilonser Modi-i linük yimtiba nung tzü menenba merüktetsü atema nangzüka liasü.

Delhi Assembly elections nung BJP manifesto nung tenangzükbatem tongti rongnung Yamuna ayong merüktetsü densema liasü.

BJP-isa Delhi sorkari Centre den senteper Yamuna ayongküm nung kiojen yanglutsü aser tzü merüktetsü atema

Yamuna Kosh ka amenoktsü, ta nangzüka liasü.

Honibarnü Delhi Lieutenant Governor VK Saxena-i Chief Secretary aser Additional Chief Secretary (Irrigation & Flood Control) ajurua Yamuna ayong merüktetsü atema o lemtepa sülen Amongnü nungibo ayong nung jana agiteta indok tenzükogo.

Iba project kübok küm asem tsümgda Yamuna ayong merüktetsü. Iba maparen atema Delhi Jal Board (DJB), Irrigation & Flood Control Department (I&FC), Municipal Corporation of Delhi (MCD), Environment Department, Public Works Department (PWD) aser Delhi Development Authority (DDA) longjemer inyaktü.



February 16, 2025 nü New Delhi nung Delhi Police-i Raising Day Parade nung shilem agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, FEBRUARY (TSÜKLAI) 17, 2025

Tarulen mejangjaba rongsen

Alima nung takar aika lir aser item takartemji kar pei kolok aser shisatsü agi apiteta inyakba mapatem nungi aruba rongsen agi akar, ano karbo pei tsüraburtem senmang amangyonga aruba nungia akar saka karbo kong nungi aruba rongsenar meshitetka aser tarulen mejangjaba roongsen agi akabatema lir. Item rongnungji, tesasatsüka, mejangjatetba lenmang nungi rongsen agir magima bendena yur magishi alima nungi anojungi aser ajungbena pei taküm atembaji Tamil Nadu nung taoba Chief minister Jayalalithaa ka asütsü. La ya amitsür, chirnur mali saka topur tajung aser tashi tulu akaba yimten lenir dang masü saka kanga takartsür ka liasü. Ibayongji, la akaba rongsentemji koba lenmang aser mapa nungi bendenba rongsenar bushisüngdangtsü asoshi la anemertemi okadak ken o benoker tang küm 21 buba nung Karnataka nung okadak obendangertemi Jayalalithaa meyong hon zük aser hon agi yangluba osettem seret 27 tashi Tamil Nadu government meyong akümtsü asoshi obendanga agütsüogo. Jayalilathaa-bo 2016 küm süogo saka la anema benokba ken o bo masü okadak tepdaka liasüba, aji tang kakteta angadanger obendangertemi la rongsenji yimten meyong asütsü obendang agütsüba nungji, tanü akümlirtem tebilemdangtsü aser tangazüksü aika lir. La meyong hon agi yangluba azük aser osettem rongnungji hon korang ana aser hon agi yangluba nok ka liasü. Ibaji dang masü saka la meyong company trok tenüng nung ali acre 1526 akaba ajak la meyong masü Tamil Nadu yimten meyong kümtsüogo. Atangji, chirnur meliaka kinungertembo lir, anungji Jayalalithaa meyong rongsen ali aser hon-tem senmangji amangtsü asoshi par tedi tenu chirnurtemi okadak meranga nokdaka liasü saka obendangertemi Jayalalitha rongsenji parnok nem masü saka Tamil Nadu government nem agütsü. Atangji, Jayalilathaa Chief minister inyakba mapang, laia Tamil Nadu asoshi terenlok mapa tulu tajung aika inyaktsüogo. Item rongnung Karnataka state-i nokdangaka Cauvery ayong nungi Chennai yimti tashi tzu bener arutetba liasü. Ajisüaka, tesülen la asoshi tia majung rongsen penbuba medemer ajurua nübortem asoshi bendanga agüja inyaktsü melen, la asoshi kecha nüngdak makaba rongsenang shitak-meshitak memetetba lenmangtem nungi bendentsü tenzük. Ashiko, iba anemaji tangari okadak ken o agütsüba agi temang nunga tashidak tua armashi asü asütsüa akok. Tangbo la alima nung mali aser lai la nüngkhu bentettsüsa bendenba rongsen a bener mao alima nung dang toktsü, anungji lai bendenba rongsen ajak yimten meyong kümogo. Aji oda, Tamil Nadu nung Jayalalithaa chief minister inyakdang, lai nübortem asoshi inyakba mapa tajungtem bilemtettsü melen lai ochimashi bendenba rongsentem yimten meyong akümba otsüang Tamil Nadu otsü nung teti bilemtettsüsa lai inyaksar ogo. Atangji, Jayalalithaa amaji linük nung nisung aika rongsen bendentsü nung ain aket amai manger sangwa nung takar akümertem lir. Asen kidanger Assam nunga item ama rongsen arulen mejangja ser takar akümertem pua bushisüngdanga osang asenoki teti angashir. Kasaji, tebushir mali dang ashi, Nagaland nungbo takar akümertem kar dak alaka teimbaka kechi mapa nungi tajangzük anguba agi takar akümar meshitet aser mejangjatetba takartema aika lir. Ashiko, itemji bushia aputsü purtemang takarba kümer asütsüa akok. Ajisüaka, tebushir maliji ta ser pei amushi amua nübortem meyong rongsen auyaa akartemji takar masü auer lir. Parnokji Jayalalithaa ama teti asoshi alima nung ochimashir rongnung tetshitsüsa ataloktsü. Aji oda, tangarbo alima nung takar kümnertemi business inyaker saka asen lima nungbo takar kümnertemi government mapa bushir aser yimten nung shilem aginer ta süra, asen limaji tanü aser asünga inyaker akaba takartem lima masü saka meinyak ser auyaa akaba takartem lima asütsü. Asen lima nunga Jayalalithaa amaji akar takar kwi alitsüar na ?

OLEMSABANG

AO AROGO YIMDEN AKANGSHIA YANGLUSHITSÜ NUKLA

~ Wati Longchar (Erilibill)

(Yashi adok nungi...)

Teyanglushitsü Mera Tebilemba (hypothesis) Lemsatepba kar

- Küm pongu nungi tenet shia tenzüker transfer asütsüla.
- Equal resource sharing amkara yimtsüng arogotemi yimtaki ter shilem/temeranger tenla yokang ta ola adoktsü
- Mungdang kübok tolakang tenzüker ajak itasen liromedema yanglutsü
- Ita sen atema centralized asütsüla. Iba yagi Baptist distinctive nungi pilar masü
- Transfer asütepba agi tenzükertemi rural-urban tatzük-talem metettsü.
- Arogo nung tenzüker chirtem education asoshi Impur school upgrade sua boarding school yanglu nung timtem aika solve asütsü.
- Centralized system bener aru nung ochimashi tali adoktsü anungji tang inyakya aliba yayim ya dang akangshir ao tajungba
- Deacon shimba Komite nung Pastor aser toklang tenzüker matentsüla
- Pastor tanela anir aruba mapa dang inyak nung ajungtsü. Sen ketdangsuba yabo tangari inyakdaksütsüla
- Town-tem nung fellowship aika lir, item fellowship-i pei sasa noktadaksü asü masü asadangtet full autonomy agütsütsüla.
- Tenzüker bushiba yimya melenshitsüla. Tenzüker shimba nung politics asayaa shimba ajanga arogo raksar.
- Ochimashi tenzüker arogo nung magitsüla
- Revival akaba yimya aser jaka melenshitsüla (ano aika)

Koba mera agitsü?

Item tebilemba (hypothesis) ajak ya ground nung test masü tashi olulu dang asütsü aser mapa makümtsü. Scientific research nung ajemdaker arogo yanglushia aser tanü tensa den apet Tsüngrem O magütsüra nuburtem tanela nung azülaa aotsü aser Khristan tamang superficial kuma aotsü, Ibai mapa kuma aotsü asoshi Mungdang mesura tapet telok kati inyaktsü apusotsüla ta bilemer. Item research finding dak ajemdaker arogo yimten yimsüsuba nung temelenshi nungdaka lir.

Baptist Distinctive

Sendaksemer aikati hypothesis dak ajemdaker Baptist distinctive nungi pilatsü ta tarentakba shisem. Asenoki angatettsüba kaji: Baptist Distinctive ya kodanga memelenshitsü aser memelenshir (fixed doctrine) ta mangatettsüla. Baptist denomination koda tenzük aji melephir, saka Baptist tamanger telok kümteter küm 500 tashi ajunger, aser alima kinuk ajakleni prokshio arogo kar nung tala tanüra tzuentsür, putir tola masemi aliba karibo asemer (Nagaland nunga arogo kar nungbo asemer), Bishop mali aru, saka tanübo bishop aika lir, lim arogo kecha telok den mesendaktepi lia aru, saka tanübo Association, Assembly, Convention, Council ta tenteta lir. Arogo senbong centralized administration mali liasü, saka arogo aika nung centralized sua bener aor, Pastor local arogoi dang shima aser ita sen agüja aru, saka alima aika nung Mungdang ajanga pastor shimer and ita sen Mungdang ajanga agütsür, tenzüker karbo retired masü tashi arogo ka nung dang inyaka aru, saka tanübo arogo aika nung term yanglua transfer system benoka bener aor. Ano Baptist arogo kar nungbo yaa Lai tesayuba na ta bilemtsüsa inyakba angutsü. Tat. agi, Baptist arogo kar nungbo tetsür nem sayutsüngi mesudaktsür aser putir sarasadema mesudaktsür, a.a.

Baptist distinctive nung kodanga memelenshibaji Tsüngremji "OCHI" ta azüitba aser iba "Ochi" inyakbaji lir. Yongji Baptist arogoi Khrista tekolak, Ochibaji Tsüngrem ta nangzükbaji Baptist tamang kimong lir. Iba Ochi kimong nung (a) Yisu Khristaji asen kümzüksang ta amangba (b) Laishibaji tematiba tashi – Tsüngrem Ochi tesayuba (c) Pei tamang aser Tsüngrem tauchi agi dang tekümtet ngutet. Item ajakji "Ochi" kimong nungji amendaka lir. Tanga distinctive (a) Pei arogo jurila tashi (b) Tzüsenba aser Kibuba Benjung (c) Yimden aser arogo tepila, aser tanga inyakyim balala ajakji pei nubur dak apet melenshia benshiba angur. Saka "Ochi" shiba Khrista lir ibaji Baptist tesayuba teyongtsü. Iba tangatetba nung sabangpur aikati Ochi kimong nung tera yanger system aser inyakyim nung melenshiba agi teraksa madoker. Ya junger aser ibai ajanga lokti ajak asoshi temelenshi tajungba bener arutettsü ta sura, tensa aser alima melenshia aoba den yanglutshitsü kanga tongtibang ta lemsatep. Iba den sabangpur kari tekümdangtsü o yamai shisem: Inyakyim nung yayim (system) melenshiba kisung jagi temelenshi bener marutettsü. Teinyaker dak tuluka keta lir. Pastor ka wadangji kechi aji metettsüla. Sama aliba pur tanela anir aruba ya lir aser tenzükertemi koba tashi temulung agütsür? Santem tenung meteta lir mali, arogopur taküm aser kibong yangluba nung koba tashi bendanga agüja mapang indoker? Khristar arogo ka asoshi amangbapur rongnung kotak yimli senmangtsü koba tashi sayuteter? Ketdangsuba nung nuburtemi aser Kibubai koba tashi tamang kateta lir? Aser tanela nung mangdang tejangja akaba arogo ka asütsü koma khuret abener? Iba khuretji makara Pastor term aser transfer, centralized structure agi dangbo temelenshi bener marutettsü. Temolungjang meruktettsüla aser Tsüngrem akhum tsübuttsüla. Arogo yayim yanglushiba aser amangba pur asoshi khuret abenba anarpongla liromedema jung junga asadanger mera tasenji agitsüla.

Otembang

YSS ya 372 züngsemi akümba tepo maket sensaksem sabang ka. Yangi arogo nung tenzüker, secular scholar India aser balala nungi dena lir. Mapang shia iba sabang nung common issue balala lemsatepa shisatsü agütsüteper aser public awareness asoshi print aser social media nung lemsateper. Kar asoshibo item onuk tako asütsü, saka lokti ajungtsü atema lemsateper asü nung positive sua agidaktsüner. Ao arogo, lokti, talisa DABA nung koba mepetmesu adoka lir iba sendakba nung ocet 9 toashi zülüogo aser media nung lemsatepogo. Karbo temoatsü nguogo ta bilemer. O tesepra aser tim masüba o zülua lira sensaksem tephong kümtsür khuret aser item oji meypa agir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Ze-Naki nung Jakhama Inter-Denominational Crusade tembangogo



February 16 nikongdang Jakhama Inter-Denominational Crusade tatembangbuba sentong nung Rev. Dr. Zotuo Kiewhuo-i tamanger ka atema sarasademtsüba aser Koinonia Baptist Church nung senior pastor aser Kohima Bible College Principal, Rev. Dr. Zotuo Kiewhuo-i Tsüngrem O jembidang tangokba noksa nung angur.

Kohima, February 16 (TYO): Ze-Naki ground nung February 13 nungi tenzüka Jakhama Inter-Denominational Crusade agi aser February 16 nü tembangogo.

Iba crusade ya "Kodang tanela temeshi nenok dangi arudir nenoki ain tashi angutsü aser Yirusalem, Judea aser Samaria den alima tatembang tashi nenok Kü kulitem asütsü (Tenyartem Mapa 1:8)" omen nung ajemdaker agi.

Koinonia Media Ministry-i ashiba agi, anogo pezünü sentong nung Koinonia Baptist Church nung senior pastor aser Kohima Bible College Principal Rev. Dr. Zotuo Kiewhuo, Koinonia Prayer Centre nung pastor H. Rokopra Mekro aser Koinonia Baptist Church nung Assistant Pastor Zashekho Hibo nungeri Tsüngrem O jembia liasü.

Tongti o jembirtemi tamang, tekümtet aser taneptsüba onüktem nung ajemdaker sayutsüngia liasü. Iba crusade nung denominations balala nungi aika aden.

Amongnü nikongdang tatembangbuba sentong nung Rev. Dr. Zotuo Kiewhuo-i tamangertem dang Yisu dak rangloksü aser Kibuba nung pelatsü ayongzüka liasü.

Paisa, "Tsüngremi ajak nem mapang kasa agüja lir aser kenü anogo nungbo Tsüngremi ajak dang senti mapangji kodak yimli atema amshir asü? ta asüngdangtsü," ta ashi.

Dr. Kiewhuo-i, "Menenpurtem kümzüksü atema Yisu Khrista Kangki nung asü. Ibaji ajanga ajak kodaki aotsüsa lenmang lapoktsü. Ajisüaka meimchirtemi temenen nungi meyiptsüla aser Yisu Khrista nem taküm bendanga agütsüsüla," ta ashi.

Paisa lokti dang, "Yisu Khrista temeim bushitsüla aser Tsüngrem O angatetttsü atema Pa temeim agizüktsüla. Iba mapang nungjagi tenzüka Tsüngrem dang nungi kodanga mepilatsüla aser Tsüngrem atema kulisür ka asütsüla," ta ayongzüik.

Koinonia Baptist Church nung Men's Department

Chairman, Khriezovolie Suokhrie leniba nung iba sentong agi aser Koinonia Baptist Arogo nung deacon Lhouzakie Rutsa-i taküm kuli lemsatepa liasü.

Kasa sentong nung Jakhama Baptist Church nung lanurtem aser Koinonia Baptist Church nung lanurtem den Junior CYE-i ken balala tena liasü.

Iba sentong nung nisung aika aden aser tanela asentenshiba den külemi temoatsü kanga nguogo.

Koinonia Prayer Centre Worship Team incharge Meciekhonu Pucho leniba nung tekülem aser tetushi ania liasü.

Iba crusade omen nung ajemdaker tamangertem dang alima tatembang tashi Khrista atema kulisürtem kaka asütsü ajungshia liasü, ta Koinonia Media Ministry-isa metetdaksü.

"Iba sentong takok anguba atema shilem agirtem aser sarasadem ajanga yarirtem ajak dang pelar. Maneni onoki tamangertem telongjem atema inyakba den külemi tamang jenjang maneni aintsü atema inyaksü," ta parnokisa metetdaksü.

ANOGO ABEN TSÜNGREM DEN
OZÜNG MANGABA
NISUNG

Shibai ozüng angaba nungi pei narong meyiper, pa sarasademjia tesempatsü.

~ **Apijemtsü 28:9**

Alima nunga pei nüburtem den apet ozüng tapet aika yanglua amshir. Item ozüng nung tashi anga-a manidakra tasüba temerenshi tashi agi merenshia südaktsür. Ajaki tashi anga-a shidak alinungbo ozüng menügdaker saka meimchirtemi yamaji melitetba ajanga ozüng agi alentsüsa akümer. Laishiba nung Tsüngrem dak amangertem asoshi Pai teinyaktsü ozüng teperi agüja lir. Shirnoki ibaji mebenshir Pai merenshir saka Pa ozüng benshirtembo Pai yarir, kümzüker aser moatsür.

Tsüngremibo ajak asoshi tajung dang bilemer atasar aser laochi sayur saka meimchir aikati ibajia mangateter aser lashi mangaba chir küma pei sasa takoksa bener arur. Tsüngrem dak amanger taküm mesüra kibong, lokti Pa ozüng kübok meli-i pei sünütsü süa dang alitsüji teyanglur Tsüngremi memulunger.

Tangrem ozüngbo mebenshinür saka sarasadembo asür, mangbapur tanü aika lir. Iba rongnungji na aser ni tena ali mulungba lehman nungbo mejajanür ta asuba av? Sarasadem koba nung tashi tulu lir iba sarasadem tashi Manga mapa tulu inyaktsüsa Tsüngremer temerük ozüng küpok melitetra na arem shiruru den saku.

WEA-i Qatar nung worship centre ka atema kimong mesemtet



Qatar nung worship centre ka asütsü atema kimong mesemtet

February 16, 2025: World Evangelical Alliance (WEA)-i Qatar nung worship centre ka asütsü

mesemtetba sentong nungji WEA Deputy General Secretary, Rev. Samuel Chiang, Doha International Center for Interfaith Dialogue nungi Dr Ibrahim bin Saleh Al Nuaimi aser Qatar sorkar ketdangsertem aden.

WEA indang local affiliate, Evangelical Churches Alliance Qatar (ECAQ)-i iba worship centre asameyanga yanglutsü. Iba centre nung tekülem sentong agiba halls, kaketnang ka, coffee shop ka aser kiyimba sentong den tanga sentongtem agitsü atema takdang asütsü.

Iba sentong nung jembidang Rev. Samuel-i, "Iba centre mesemtetba ya asenok tamang telongjem

ajanga tongtetba alizüng ka aser Tsüngrem temeim temaitsü lir. Iba worship centre ya kiojen ka dang masü saka tekülem tanela mapa ka aser alima nung Tsüngrem yimli yangertsü atema inyaksangshiba lir," ta ashi.

Qatar linük nung Khristan telok 8 shi lir aser tawa meshitetba worship centre ya Khristantem indang kiojen aika aliba tesem ka nung lir.

Centre asütsü kimong ya 2023 küm Evangelical Churches Alliance Qatar (ECAQ) nem agüja liasü. WEA General Secretary-i Qatari Ministry of Foreign Affairs ajuruba sülen ECAQ nem iba kimong agütsü. ECAQ-i

kimong ka moajang ta mapang talangka nungi sarasadema liasü.

ECAQ tongti lenir, Bishop Beba Robles-i, "Yisu Khrista tenüng sentsüwangshijang aser alima ajak nem Pa metetdakjang! Kodak nung aliba asen Tsüngremi asen (Evangelical) nüburtem nem takok ngudaktsü aser iba project longjemer inyaker. Muslim lima nung Khrista osangtajung proktsü aser Pa yimli yangertsü atema Pa nem tetushi ajak agütsür," ta ashi.

Qatar nung nütsüng shilem 90 jungnüabo bendangertem lir aser nütsüng shilem 15 shibo Khristantem lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tejashi

(adj) mepelaba (grief, sorrow)

*Tejashi mapang sarasademtsüla.

Tejem

(n) chi sorudang agizükba tzü (starch, water obtain from steaming rice)

* Chi soru shia kütsüi tejem agizüka ajemer.



Tir Yimyim

OLONG PAITEP # 7066

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemasa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzuma nung senzuba - (5)

OLONG PAITEP # 7065 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük,
11. Teronem, 12. Sempa,
13. Jahaz.

**Alokbai NBCC dangi Sunday atema inyaksü shidanger.**

Akümtsüba aliba NBCC lenirtem. Nagaland for Christ tenüng nung Deobar anogobo Dokan ajak shibangtsü ozüng agütsü nungbo, Deobar anogo ya Koda temenungratsüka süla nah? Yamaji inyaktaktsüünür. Khristan lima asünung, Khristai melaba ama inyaksüla, ozüng amer temi inyaksü üta matatsüla. Tashi mangarji Tsüngremi inyaksü ta Tsüngrem nem ah menongloksütsüla. Aseni akokbabo inyakdi. Tsüngrem tsüüngdang kechi langzüksü. Arogo shia dangi osang agütsüür, Deobar anogo yabo amongnü ama meshiteta mongnü. Shiti ya ngulie sarasadema mapa küma inyaksü merangangma.

NBCC sa matayonga Pastor fellowship senteper tongtipangsa Dimapur ama dokan totally band asütsü ayimoktsü nung junger. Dokan tila tulu kecha mali. Dokan tulu (Mahal) amala ajak shibangtsüla. Deobar dokan lapoka aliba ngua pastortem temolung maronger noh? Ni Alokbai bo temolung rongsar

Oh Tsüngrem ni Alokbai bilembaji imlibilema atalokdakjangma.

~ Aienla Ao

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tripura CM-i Union Minister Jitendra Singh den ajuruteb

Agartala, February 16, 2025

(Agencies): Tripura Chief Minister Manik Saha-i February 16, 2025 nü Union Minister Dr. Jitendra Singh den ajuruteb aser terenlok maparen indang onük kar lemsatepogo.

CM Saha-i Tripura nung advanced weather forecasting, administrative matters, aser bamboo industry indang benoka lemsatep.

Paisa Union Minister Dr. Jitendra dang tawa Agartala-Akhaura railway link lapokba aser iba ajanga Northeast o

Bangladesh tali sendaktepba indang ashi.

Tripura nung taküm akhidang nungi tzünglu kanga arur anungji weather forecasting aser disaster preparedness atema technology tsütsü teyari agütsütsüla ta CM Saha-isa mepishi.

Ministry of Earth Sciences-i küm ka tsüngda Tripura nung weather radar ka amenoktsü ta Union Minister Dr. Jitendra-ia nangzük.

Iba radar ya tang aliba space research center nung

amenoktsü aser rainfall o cyclones asadangtetsü ta pai ashi.

Assam (Jorhat) aser Manipur nung biotechnology aser bamboo research indang specialized institutes lapoka lir aser item rejutemi Tripura sorkar den inyaksü ta Union Minister-isa Dr. Saha dang ashi.

Dr. Saha-i Health portfolio bena lir aser pai Union Minister dang Tripura nung mezüngbuba Government Dental College lapoktsü indang lemsatep.

MP Gaurav Gogoi-i BJP aitsür; Kuli kecha mali ta ashir

Guwahati, February 16, 2025

(Agencies): BJP-i pa aser pa kinungtsü dak tai tongloksüba magizüker aser iba ya kuli kecha mali ta Congress MP Gaurav Gogoi-i ashi.

BJP sorkari tamakok angubatemi miimbangtsü atema dang iba tiyazü ken o adoka jembir ta Gogoi-i ashi.

Assam Assembly elections agitsü küm ka dang lia ibala ken o ya adoka jembir ta Congress

General Secretary Jairam Ramesh-i ashibaji shitak ta Gaurav Gogoi-i ashi.

BJP sorkari parnoki nangzükbatem meinyakteter aser tamakok angubatemi miimbangtsü atema kuli maliba onüktem jembir ta paisa ashi.

"Tenüng menüksüba atema onoki tapet mapa inyaksü. Ajisüaka Assam nung nübertemi tiyazü onük metettsü ta ni

amanger. Jharkhand nungeri Vidhan Sabha elections mapang Himanta Biswa Sarma dak mamangba ama Assamese voters-ia kasa shisatsü alitsü ni amanger" ta Gogoi-isa metetdaksü.

BJP-i tenüng menüksüba maparen yagi parnok takoksa ajurutsü aser Assam nung taruba elections nung Congress-i aniba sorkar ka akümtsü, ta paisa ashi.

USTM ya ashikülak reju ka lir; PhD's ayoker: CM Sarma

Guwahati, February 16, 2025

(Agencies): Assam Chief Minister Himanta Biswa Sarma-i University of Science and Technology Meghalaya (USTM) aitsüogo.

USTM nung taila degrees agütsür aser senotsü tim mesüi amshir ta CM Sarma-i Deobarnü ashi.

USTM nung mapa inyaktertem anentsüba atema tebilemtsü adoka alidang pai iba olen shiogo.

"USTM nung Chancellor Mahbubul Hoque ya ashikülaker ka lir. Iba reju yagi

ashikülak mapa inyaker aser kaketshirtem nem taila kulikakettem agütsür" ta CM Sarma-i ashi.

"Hoque indang caste certificate ya yanglushiba lir. Shia metetertemi kodaser yiyazü OBC certificate ka abener pusemer?" ta pai asüngdang.

Sarma-isa USTM-i academic degrees atema ashishitepa "PhDs ayoker" ta ashi.

"USTM nung tatidang timi magir aser degrees shitak magütsür. Iba reju ya tiyazü nung

dang inyaker" ta pai ashi.

"State sorkari tangalen nungi sen aruba anema inyakba ajanga USTM nung senotsü timtem adok. Onoki foreign funding noktangba ajanga parnok senotsü tsütsü kangshir" ta CM Sarma-isa metetdaksü.

"Shisashir ta ajar kari iba reju pusema nungiter. Parnoki Assam nungi shisashir kar idakji yua lir aser parnoki reju ajungketer" ta paisa ashi.

"Parnoki kü anema ken o benoktsü metsübur. Iba reju indang jembiba ya nüngdak mali" ta CM Sarma-isa ashi.

Manipur Police-i MLA tem amokmerenba calls putetogo

Imphal, February 16, 2025

(Agencies): Manipur State Assembly nung züngsemtem amokmerenba calls kar Manipur Police nung Cyber Crime-i putetogo.

MLA temi onük benokba sülen state police-i item calls putet. Manipur nung sorkar tasen ka akümtsü atema nisung

kari MLA tem anisatsü meranger.

Iba dak sendakba nung Imphal Police Station nung FIR ka benokogo aser bushisüngdang tenzükogo.

February 13, 2025 nü Manipur nung President's Rule benokba sülen political party

balala nungi MLA temi chief minister ka shimtsü meranger. Iba mapang MLA tem dangi nisung balalai phone asütsü tenzük.

Manipur nung BJP dak alia political party tem aser tanga telok aikati President's Rule benokba atema BJP MLA tem dak tai tongloksür.

Gaza nung molumi kishi lapoktsü: Netanyahu



Jerusalem, Tsüklai/February 16 (Agencies): Hamas-i pua bener oa aliba tanüngba nisungtem ajunga mechiokra Gaza nung molumi kishi lapoktsü, ta Israel Ato Kilonser Benjamin Netanyahu-i Deobarnü amokmeren. Jerusalem nung US Secretary of State Marco Rubio den ajurutebpa sülen pai iba o ya jembia liasü.

Honibarnü ano nisung asem chiokba nung yariba asoshi pai US Tir Donald Trump dang pelaba lemsatep aser par linük ya Trump administration den teka amteper kanga junga angatettepa inyaker ta ashi.

"Asenok tasa sako lir aser iba tasaji yimjak nung tetibo tejangja melemsateptet. Molumi kishi kodang lapoktsüar asenoki melemsateptsü, kechiaser parnoki pua bener oa alir tatemsaba tashi mechiokra iba kishi lapoktsü," ta Netanyahu-i ashi.

Pai Hamas mitkar tashi aser Gaza nung yimsü asütsü teimla aliba ajunga samatsütsü nangzük.

Netanyahu-isa Rubio den ken o balala kanga junga jembishinü süogo ta ashi.

Paisa America nunger teyari nung Iran anema mapa renemtsü nükjidong lir, ta

ashi.

"Tesüba ita 16 tsüngta Tir Trump lenisüba tashi tait kübok Iran indang kiralongraba nung takoksa tulu agütsü aser ner teyari nung mapa renemtsü arendaka mali," ta pai ashi aser kodanga 'nuclear Iran' malitsü ta ashi.

Rubio-ia Iran nung kodanga nuclear noknü malitsüla ta ashi aser iba linük ya region nung mepetmesü tulutiba adokdaksüba linükji lir ta ashi.

"Nuclear Iran kodanga malitsü, kechiaser ibaji ajanga Iran ya temulung tali ulutsü. Aji kodanga mataloktsü," ta Rubio-i osangbener senden ka nung ashi.

Paia Hamas ya samatsütsüla ta ashi.

"Hamas ya mitkar mesüra sorkar tashi ka ama melidaksütsüla. Parnok ya samatsütsüla," ta pai ashi.

M23 telok Bukavu yimti teyong tongogo



Bukavu, Tsüklai/February 16 (Agencies): Rwandan-i teyari agütsüba M23 telok Deobarnü Bukavu yimti teyong tonga iogo, ta tenük kuli agütsürtem aser iba telok yagi metetdakja liasü. Iba yimti ya Democratic Republic of Congo anütoklen yimti tulutiba rongnung tanabuba lir.

January ita tatemlen Goma yimti atsüngba sülen iba telok yagi iba tongtibanng yimti ya atsüngtsü asoshi meranga aruogo. Bukavu yimti atsüngra iba ya par telok asoshi 2022 küm asüngsashiba sülen takok tulutiba asütsü.

Honibar aonung Congo tiri iba provincial yimtiba ya parnok sepaia aser parnok nem teyari agütsürtemi azüoka lir ta shiogo, saka Deobar anepdang M23 telok Bukavu yimti teyong tongogo, ta yimti nung alir aser local ketdangsürtemi metetdakja liasü.

M23 otongdar Willy

Ngoma-i Reuters dang ashiba agi, parnok yimti telungi iogo aser provincial yimtiba central Independence Square nung sepaitem telok ka tangokba noksa X ajanga lemsatepa liasü.

Ken o dak sendakba nung Congo army aser sorkari kecha telangzüba magütsü.

Iba telok ya taküm küm tetenzük nungi kanga tejakdangi odar aser kidanger linük nungi sepaitem densemba ajanga arrtsü adener rara adoktsü akok ta tsübuva bilemer.

Congo ya alima nung tantalum aser cobalt timtiba adokdaksüba linük lir, koba electric gari atema battery aser mobile phone tem yangluba mapang kanga tongtibanng lir. Congo ya ano alima nung copper producer rongnung tasembuba lir aser iba den coltan, lithium, tin, tungsten aser hon nungera linük nung angur.

Bukavu nung alirtemi Deobarnü ashiba agi, parnoki

M23 sepaitem kecha tetsükdaksü makai central districts ajanga süiba nguogo. Mapang ka nung Bukavu indang military camp tongtiba Camp Saio nung prangbong akhaba ola angashiogo, ta camp anasa alir nisung anati ashi.

RSF-i Zamzam refugee camp maneni makdar

Khartoum, Tsüklai/February 16 (Agencies): Sudanese paramilitary Rapid Support Forces (RSF)-i North Darfur state yimtiba el-Fasher anasa amenoka aliba Zamzam refugee camp asendenshir makdar.

Hokolbarnü iba tesem nung alirtem aser medic temi ashiba agi RSF puri iba camp maka liasü, koba hopta ka tsüngda asemben tashi longbangogo.

Iba hopta camp nung nisung tenet tashi tepsetogo, ta Doctors Without Borders (MSF) puri ashiba den, tensa majungba ajanga medic temi Zamzam nung surgery magiteti arudar ta metetdaksü.

United Nations secretary-general atema otongdar Stephane Dujarric-i, tang asendenshir raratepba mapang prangbong tesashitem amshidar ta ashiba den telok ajak dang azütokshi anentsü ayongzüka liasü.

Linük yimtiba Khartoum nung Sudanese Armed Forces (SAF) makokba sülen RSF pur Darfur tajungba



KOHIMA AO OFFICERTEM TELONGJEM
"Telongjem nung leniba"

METETDAKTSÜR

Kohima Ao Officer's Tem Telongjem (KAOT) rongdak lokti senden ka **February 20, 2025** nikongdang **4:00** ako nungi tenzüka **Molu Ki**, Kohima nung alitsü metetdaksür.

Anungji, züngsem ajak arua adentsü asoshi mepshia sangdonger.

Sd/-
LIMASUNEP JAMIR, IPS
President, KAOT

Sd/-
RONGSENLEMZUNG
General Secretary, KAOT

**OFFICE OF THE
HIGH COURT BAR ASSOCIATION**
Regd.No. Home/SRC-6419
Kohima :Nagaland


TENÜNGSANG AGÜTSÜR

Gauhati High Court nung Additional Judge ka ama February 12, 2025 nü shimba atema Yarenjungla Longkumer nem Gauhati High Court, Kohima Bench indang High Court Bar Association ajanga tenüngsang agütsür.

Yarenjungla Longkumer ya 1983 küm Little Flower School Kohima nungi matric pass asü aser 1988 küm Lady Shri Ram College New Delhi nungi BA (Hons) azüng. Campus Law Center Delhi nungi 1992 küm LLB renemba sülen la Bar Council of North East nung Gauhati High Court kübok 03.11.1992 nung tenüng zülüok. La Government panel nung Junior Govt. Advocate ka ama 1996 nung aden aser Jr. Govt. Advocate, Additional Sr. Gov. Advocate aser Sr. Govt. Advocate aka inyak. La ya 10.04.2013 nung District and Session Judge Kohima ama shim aser Special Judge Lokayukta, Session Judge Dimapur (anaben), Registrar Kohima Bench aser Secretary Judicial Law Department, Govt. of Nagaland inyaka liasü.

Naga nunger tetsürtem rongnungi High Court nung Judge ka ama shimba rongnung Yarenjungla Longkumer ya mezüng alitsü. Ibai Bar atema kisüng masü saka Naga tsür ajunga asoshi tejak tentetba mapang lir.

La iba menden nung mener Justice asoshi maneni inyaktettsü moatsür.



C. T. Jamir Sr. Advocate
President
HBCA, Kohima



Joshua Sheqi
General Secretary
HBCA, Kohima



azüoktsü merangdar.

RSF aser SAF na rara tenzüka sülen ita 22 shi aoer aser paramilitary telok yagi Sudan anüolen Darfur tesem aser kidanger Kordofan tesem tuluba ka azüoker lir.

Army-i Sudang anütok aser antoktip azüoker lir aser tawa Khartoum nunga tejakleni odar.

Zamzam nung nisung 500,000 shir lir, shirnok Darfur nung raraba ajanga jenshia aoba lir aser kasa mapang nung el-Fasher nung nisung million 1.8 lir. Iba tesem ya Darfur tesem nung RSF anema nokdakba tesem tatembangbuba lir.

RSF-i iba tesem ya ita aika sabanger lir aser ashiba agi,

iba camp ya tang army den külemi rara aliba taoba mapang telungpur teloktem tamendakdak lir.

Camp nung alirtem karibo parnok kümzüka alitsü atema ali nung ongken tur lir, ta iba tesem nung alir kati ashiba den activists temi lemsatepba video ka nunga nguogo.

Sudan nung UN ketdangsür Clementine N k w e t a - S a l a m i - i Brehostibarnü, Zamzam IDP camp amakba aser nüburtem jena aoba lenmang nokdanga ayuba osang angazüka la kanga aoksaba lemsatepogo.

RSF-isa, camp nung alirtem nem teyari agütsüba nokdanga arudar, ta UN aser aid workers temi ashi.

Alcaraz sülen Fonseca ATP clay court finalist tanobusang kümogo

Tsüklai/February 16, 2025

(Agencies): Brazil nunger arishi küm 18 tain asayar Joao Fonseca-i Argentina Open semifinal nung Serbia nunger asayar Laslo Djere 7-6(3), 5-7, 6-1 agi kokogo aser pa ya Carlos Alcaraz sülen clay court nung ATP finalist tanobusang kümogo.

Taoba mapang World No. 20 Argentina nunger asayar Jose Acasuso-i 2001 (Buenos Aires) final tonga asayaba sülen pa ya South America nunger ATP Tour finalist tanobusang kümogo. Fonseca-i tang tashi nung ATP Tour title ka danga bena mali aser pa final nung fifth seed Francisco Cerundolo den asayatsü, shibai Spain nunger Pedro

Martinez 6-2 6-4 agi koka liasü.

Kasa mapang nung arishi küm 18, ita pongu ser anogo 26buba nung Fonseca ya 2000 sülen ATP Tour finalist tanobusang rongnung terbuba aser Open era nung Brazil nunger rongnungi ATP asayamung final ka atongba asayar tanobusang lir.

Fonseca ya Next Gen Accelerator programme ajanga Buenos Aires nung iba asayamung nung shilem agitsü maongka ngua liasü. Next Gen Accelerator programme ya taküm atsülangshiogo aser Top 250 nung aliba 20-and-under asayar ATP 250 main draw ka aser ATP 250 quali-

fying events ana nung shilem agitsü melar.

Asaya nung Brazil nunger asayar yagi forehand winners 27 aser backhand winner 11 ngua liasü. Mezüngbuba set nung pai serve break asütsü trokben maongka angu saka magitet. Ibayongji tie-break asayatsüsa aküm saka pai asaya koka liasü.

"Tanü asayar tajung ka den kanga saka asayaogo. Pa qualifying ajanga asayamungi ait anungji pa kanga junga asaya arua liasü," ta pai ashi.

Semifinal nung takok anguba sülen Fonseca jenjang 25 tejakdangi tua tang ATP Live Rankings nung jenjang 74bubai tuogo.

Kiplimo-i otsü tasen ka yangluogo



Tsüklai/February 16, 2025

(Agencies): Uganda nunger asemteper Jacob Kiplimo, ya minute 57 majung tsüngda half marathon alizüing tonga asemba mezüngbuba asayar kümogo.

Barcelona nung asemtepba mapang pai taoba world record dang nungi second 48 agi takaraba agi alizüing tongteta otsü tasen ka yangluogo.

Arishi küm 24 tain Kiplimo-i alizüing ya minute 56 aser second 42 nung tongteta Ethiopia nunger Yomif Kejelcha-i taoba küm October ita Valencia nung alizüing 57:30 nung tongteta otsü tasen yanglur aliba ajatetogo.

Tebur world half-marathon record nung Kiplimo indang mapang ya best single improvement lir.

"Ni tanü kechi ajangzüktetogo, iba atema kanga pelar," ta taoba mapang 10,000m Olympic

aser World Championships bronze medalist yagi ashi.

"Ni kanga junga asemtepnüa liasü, saka ni otsü tasen ka yanglutsü tabo imla maliasü," ta pai ashi.

"Kü den toktepertem nungi pilatsü atema ni mezüngbuba kilometers ana kanga kanga asem. Asemtepa aoba mapang ni otsü tasen ka yanglua kanga kara asema aoba meteta aküm, anungji kechi südir süaka tang asema aliba amai dang asemtsüla ta bilema liasü," ta Kiplimo-i ashi.

Paisa, World Athletics event nung km15 asemtepba 39:47 nung tongteta otsü tasen ka yangluogo, koba mopung mali 13°C temperature nung asema liasü.

Iba asemtepba nung Kiplimo sülen külem Uganda nunger Geoffrey Kamworor (58:44) tanabuba aser Kenya nunger Samuel Mailu (59:40) tasembuba jenjang nung tembanga liasü.

18buba IPL : KKR aser RCB na mezüng asayatsü

Tsüklai/February 16, 2025

(Agencies): 18buba Indian Premier League season March 22 nü defending champions Kolkata Knight Riders aser Royal Challengers Bengaluru na Eden Gardens nung asaya-a tenzüksü.

Eden Gardens koba KKR indang home ground lir iba tesem nung May 25 nü final-a asayatsü. Iba den bendenloksema Eden Gardens nung May 23 nü Qualifier 2 asayatsü.

Tanungba play-off ana-May 20 nü Qualifier 1 aser May 21 nü Eliminator- 2024 runners-up Sunrisers Hyderabad indang home ground nung asayatsü.

Taküm IPL nung anogo

65 nung asaya 74 asayatsü. Double-headers 12 asayatsü aser asayatem Guwahati, Visakhapatnam aser Dharamsala densema yimti 13 nung asayatsü.

Nikongtsütsü asayatem 3:30 ako nungtenzüksü aser aonung asayatem 7:30 ako nungi tenzüka asayatsü.

SRH aser 2008 champions Rajasthan Royals na March 23 nü Rajiv Gandhi International Stadium nung asayatsü.

Kasa anogo Chennai Super Kings aser Mumbai Indians na MA Chidambaram Stadium nung asayatsü. CSK aser MI na ano April 20 nüa Wankhede Stadium nung asayatsü.

Delhi Capitals pur IPL 2025 ya March 24 nü

Lucknow Super Giants (LSG) den asaya-a tenzüksü aser 2022 champions Gujarat Titans (GT) pur March 25 nü Punjab Kings (PBKS) den Ahmedabad nung asayatsü.

Visakhapatnam aser Guwahati nung DC aser RR indang home asaya anana ayongzüka asayatsü aser Punjab Kings pur Dharamsala nung home asaya asem asayatsü.

KKR aser DC nati tang tashi IPL season tasenba atema captain sangdonga mali. RCB-i Rajat Patidar captain asütsü shimogo aser PBKS aser LSG natia taoba mapang Shreyas Iyer aser Rishabh Pant na captain asütsü shimogo.



Mumbai, February 16: Union Minister for Youth Affairs & Sports and Labour and Employment Dr. Mansukh Mandaviya-i 'Sundays on Cycle campaign' tenzüksüogo. Minister Dr. Mansukh-i anir Deobar anepdang cycle anirtem Mumbai kübok Gateway of India nung rally ka agiogo, koba nüburtem nem cycling ajanga libaliro tajung angazüka aser anema alitsü asoshi ajungmesotsü nükjidong nung ayongzüka liasü.

Mumbai Indians-i Mujeeb Ur Rahman alizükogo

New Dehli, Tsüklai/February 16 (Agencies):

Indian Premier League ponguben koker aliba Mumbai Indians-i Deobarnü Allah Ghazanfar melena Afghanistan nunger off-spinner Mujeeb Ur Rahman alizükogo.

Allah Ghazanfar ya yiruba ajanga IPL 2025 nung masayateteüsa kümogo aser ibayongji MI-i Rahman anisema liasü.

Arishi küm 18 tain Afghanistan nunger asayar ya L4 vertebra raksaba sülen taruba Champions Trophy nunga masayatetsü.

Ghazanfar ya tawa Afghanistan team Zimbabwe nung oa asayaba mapang yirua liasü.

"Ghazanfar takaratiba nung taneptsü angutsü Mumbai Indians-i imlaja atar aser Mujeeb pelashishia jaoker," ta MI-i sangdong ka ajanga metetdaksü.

Mujeeb ya Afghanistan tenüng nungi asayaba asayatem rongnung tanobusang rongnung ka lir aser pa arishi küm 17 asüba mapang IPL nung asayaogo.

Mujeeb indang economy rate 6.5 shi lir aser pai T20 asaya 300 (international aser domestic) nung wicket 330 agir lir. IPL mega auction nung Mumbai Indians-i arishi küm 18 tain off-spinner Ghazanfar atema sen crore 4.80 agüja liasü.

BILEMDANGANG

"Tamakok dang nungibo tetsübu agi mangdang aika matalokdaksür."